

Plenchi

Bèl a bati

Ora novèmber dal a den ta manera e spit ta subi i dianan ta bula mas lihé ku normal. Kaya ta bira hopi druk i hendenan ta kumpra kos manera ta mundu ta bai kaba. Of manera ora aña boltu no tin bendementu di kos na Korsou.

Ban poco poko tesoronan di nos isla. Gasta na midí. Tin biahá ta mihó bo spar bo sèn i kumpra ora tin ganga pa bo haña mas pa bo sèn. Bo tambe mester usa bo sèn ku kabes. Maske kuantu propaganda tin, kumpra loke bo mester i no loke ke bendebu. Anto no ta tur aña bo mester kambia stul ni kortina. Ta material i nan no ta importante. Si ta pa bo wowo bo ta hasie, siña bo wowo pa kustrumbra ku loke bo tin. Djis kambia e manera e stulnan. Of kumpra un tela pone un streki na bo stulnan. Of kumpra of kose un paña di mesa nobo so. Bo mester ta kreativo pa usa bo sèn pa kosnan duradero. Mobilario mester ta duradero i no pa kambia kada 2 of 5 aña.

Subi nos plenchi di skol pa bo disfrutá di nos hòbennan su talento i nan logronan. Esei ta mas importante ku tur material, e tempu hinká den hende i naturalesa.

Prepará kon boso ta bai krea momentunan pa famia bin huntu i hasi aktividad huntu den e dianan di fiesta. Te hasta e komementu laga nos hasie na midí. Ta bon pa kome tur e kumindanan delisioso di fin di aña, pero sin eksagerá. Bo no tin mester di kome te bo ta rementá tur dia. Kome den un tayo i pone loke bo gusta na midí. Sin eksagerá ku tayo asina yen ku kosnan ta basha afo.

No plania komementu so, plania pa wak video i potrètnan di antes.

Kòrda susesonan chistoso di famia.

Saka potret di diferente generashon i entrevistá hende di diferente generashon riba mesun tópiko i nota of graba nan opinion. Aki un par di aña bo ta tendé bèk pa bo wak si tin kambio of desaroyo. Ta hopi kos boso por hasi como famia.

Anto no lubidá riba esnan nan so. Invitánan tambe pa bin djoin bo famia.

Ban balansá nos bida, pondiendo mas enfasis na hende ku na kos. Na enfasis na amor ku na pleitu. Kuantu biahá nos no ta pleita pa kos di kèns? Un felis siman pa boso!

Riba roster

- **24 november deliberashon ku personal di RK riba plan di maneho 2016-2020**

Not'é riba bòrchi

St. Albertus College a risibí bishita di minister Plasterk, minister di Asuntunan interior i Relashonan di Reino, ku ta na Kòrsou. Esaki den kuadro di e proyekto di "steelpan" ku a kuminsá na skol. E proyekto aki ta di Fundashon Nieuw Nederland ku ta trahando pa drecha e bario. I pa realisá e proyekto aki e fundashon a risibí sèn di Hulanda. Minister Plasterk tabata tey huntu ku representanten di e fundashon ku a splika kiko ta nan plannan. Sr. Konkie Halmeyer tambe tabata tey i e la toka algu riba "steelpan" den kombinashon ku algun alumno di nos riba blòkflùit





Den agènda

- **Fakansi**
21 desèmber 2015 pa 3 yanuari 2016

Mi ta konta

Limpiesa pa fin di año.

Luna di novèmber a dal a den i Karin a kuminsá ku su limpiesa di fin di año. Tur fin di año e ta limpia den tur kashi di paña i saka tur loke ya ta bieuw of ta di mas, pa e regalá of tira afo.

Despues di kamber e ta pasa pa sala i kushina.

Un limpiesa rigoroso, tur nachi di kas ta keda skrutiná pa tira tur kos bieuw afo.

Faina no ta gusta ku su mama ta tira hopi kos afo. Awor ku el a kumpli 3 año e ta mas konsiente di e limpiesa aki.

Ora su mama a yega na su pañanan i kosnan di hunga el a yora te snek. E no por komprondé dikon mester tira of regalá kosnan bieuw.

Su mama kada bes mester spliké ku no por warda kos bieuw paso ta trese potoshi. Pero pa Faina esaki no ta hustifikasiashon.

Awel, Colon a kima ora su mama a kue un baiskel chikí di dje pa deshasí di dje. Faina a yora inkonsolabel i a bai buska refugio den brasa di su yachi.

SU Yachi a brasé ku hopi kariño i a lague yora un ratu, te ora el a kalma. Yachi a spliké ku e baiskel lo hasi otro mucha kontentu, muchanan ku no tin niun kos di hunga.

Di tantu yora, Faina a pega soño den brasa di su Yachi. Su Yachi a zoyé i a lague drumi den su brasanan.

Despues di mei ora Faina a habri si wowonan i a smail ora el a mira ku su Yachi ainda tabatin e kargá. Pero mesora el a kòrda tambe dikon el a drumi den yachi su brasanan.

Si kara a trèk pa despues bira pensativo.

El a pone su boka na orea di su Yachi i a suspirá: “sh.. sh, keda ketu, no bisa mami ku Yachi tambe ta bieuw.”

Un prenchi

Un prenchi pa VSBO ST. JOZEF

Riba e nivel PKL e alumno nan ta bai mas leu den e parti di praktika.

Alumno nan di 4ka2 praktikando un kombersashon di venta (verkoop gesprek) i e alumno nan di 3ka2 dunando un presentashon di un produkto òf kompania ku nan mes a inventá huntu ku nan logo



Mucha djispou

Mila a pasa mainta trempan na un kòfi shòp p'e kumpra pan ku salada di tuna. El a splika ku e no ke un pan hinté sino mitar so. Juancho a puntré mesora: ""antó kiko mi mester hasi ku e otro mitar?""

Mila a purba anto e no a logra. El a bai trabou i a parti e pan ku un kolega.

Despues i algun siman Mila a bolbe na mesun kòfi shòp. El a topa un señora e biaha aki i a bai purba su suerte serka dje.

“Señora mi por haña mitar pan ku salada di tuna”. E señora a kontestá: “Sigur no dushi. Pero kua mitar bo ke esun ariba of esun abou?”